


Fasnacht 2019

Abgschtürzt!



Es isch bewiese und gar kai Grücht
Basel uff Platz 1 bi alle Sücht!
Es schloot is halt sauvyyl uff's Gmiet
Nur bsoffe verdraisch s'Baselbiet...
Wenn i dr Wessels lache gseeh
Bruuch i drey Grappa anstatt Tee!

D Bebbi wüsse wo's aane fiehrt
Und suffe dorum kontrolliert:
Henry suffe mir Bebbi zwei
Uff aim Bai lauf'sch jo au nit hei
S waiss es d Kueh und au jeede Knilch
Henry isch d' Basler Bebbi Milch

S git uff dr Wält e ganz e Huffe
Wo nur uus Fruscht dien aafu suffe
Und die am Bahnhof an de Muure
Sin abgschtürzt und sin zem beduure

Guete dringge isch e Ritual
Unkontrolliert wird's schnäll zer Qual
Drum suff' nit z'vyyl, suff' nit uus Fruscht
Suff' weniger, derfür mit Luscht
Denn anstatt bsoffe underem Disch
Wär's vyyl besser, wenn De uffgschtellt bisch

Dää FCB nüm zem gniesse isch
Verdraisch nur wenn'd bedrungge bisch
Wenn sy bim FCB jetzt spiele
Duesch glyy als Fan zer Fläsche schiele
Das isch halt laider aifach esoo
Dää Fuessball macht nur d Lääbere froh

Hesch e Abschturz, denn bisch dief gsungge
Und vorhäär wohrschynts sturzbedrungge
Es isch halt Bruuch uus alter Zyt
Wär Sorge het nimmt Aquavit

Bisch süchtig, bisch ständig am Rand
Und so als Randständig bekannt
Mer hän vo allem aifach z'vyyl
Und hange umme ohni Zyyt
Die halb' Menschheit stirbt an Sucht – dasch so
Und au die Andere mien schynts go

S Suchtbrobleem sprängt alli Norme
Und es git divärsi Forme:
Mänätscher sniffe Kokain
Nikotin und Amphetamin
Und verdiene derby vyyl Gäld
Gäld, wo de arme Sieche fäählt

Vyyl Gäld, kai Grips, derfür vyyl Macht
In USA kunnsch' so an d Macht
E Egomann nit zem erdraage
Nur bsoffe kaasch dä Knoot verdraage
Uus Sucht und Wahnsinn Dää bestooht
Und statt regiert zue Nutte goot

Bisch alt und isch's Dir nüm so wohl
Verfallsch langsam – im Alkohol
E letschte Brand no, denn bisch Äsche
Und vorhäär läärsch nomool e Fläsche
S Fazit am Schluss isch klar nit schwer:
«Ich habe fertig! Flasche leer!»

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne
sin vom Määntig znacht bis am Mittwoch demoorge!
Deert und an de 3 Verkaufsständ (CINS) in dr Stadt ka
men au alli Zeedel und Schnitzelbängg, d Blaggedde
und dr Rädabäng kaufe.